


醫  
林  
蒙  
求

中

420  
98  
2



門 武  
籍 38  
卷 2



醫林蒙求卷中

標題

羲皇玉版	炎帝赭鞭	通明嶺上	安期海邊
李譔博好	呂廣重編	奉真三日	德秀二年
鳳網百花	蘄邵五石	時珍鐵落	與正金液
楊介存真	叔和診脉	掌林校正	劉馬墨白
崔或恭儉	自化養頤	徐登東流	桑君上池
石氏龍伏	劉子鬼遺	僦氏肇端	巫彭初鑿
玄晏甲乙	東园子午	郝翁雪玄	李生雲母
董仙土窟	許氏靈府	劉敏書屏	以潛閉户

醫林典故 卷之四  
立言錄驗 仲化發微 劉氏青華 葛生白衣  
劉郎辟穀 張女不饑 文垣玄珠 宗厚玉機  
裴顏權衡 雷敷炮灸 元禎誑紹 趙卿權詐  
仲遠仁利 明祐補瀉 孝緒人葭 盧絳甘蔗  
廖氏丹井 莫子冰盤 洪蘊紫袍 國禎寶鞍  
文紀濕麪 師文水轉 秦氏六不 郭玉四難  
法衛二帝 溫叟三婦 守真美酒 潔古大芥  
蘓子盡告 宋生優主 川父醫史 寧極藥譜  
陳子食性 巢氏病源 醫均委制 苗父祝言  
藏器拾遺 損之刪繁 子豫赤丸 文子朱幡

魏澹議都 秦和醫國 士羸直指 從周自得  
度卿暗解 昭遇點識 致和楮帛 夫徵首飾  
韋氏藥王 孫公聖童 文仲風氣 叔展麴窮  
熊均大全 實功正宗 繆雍經疏 韓懋醫通  
道君總錄 明皇廣濟 仙伯七方 徐王十劑  
憲藏三品 吳源五世 仁宗善救 太宗聖惠  
赤松冰玉 鄧紹露珠 伯宗姓氏 德用繪圖  
鳴鶴腦戶 甄權肩隅 元祖割牛 唐皇剪鬚  
幸靈草木 涪翁漢釣 法師獺爪 道士人溺  
王貺鍼舌 漢卿剔竅 元珠妙旨 王燾秘要

張暢墓贈

紀朋兆羹

蔡誤蟹螯

戴正錫飭

毅叔遁太

啓東壓驚

華公脾腐

錢氏膽橫

左慈補導

沈建服食

李源天寶

從志陰德

謙甫衛生

明之辨惑

進之醫壘

子陽壽域

醫林蒙求中卷

肥後

樋口器季成撰

紀府

菊池元習博甫校

羲皇玉版 炎帝赭鞭

補史記  
作三十  
五弦

宓羲氏以木德王風姓也一曰庖犧氏亦曰大昊蛇首人身生有聖德母號華胥都於陳作瑟有三十六絃其理天下也仰則觀象於天俯則觀法於地鳥獸之文與地之宜近取諸身遠取諸物於是造書契以代結繩之政畫八卦以通神明之德以類萬物之情所以六氣六府五藏五行陰陽水火升降得以有象

百病之理得以類推炎黃因斯乃嘗味百草而制九  
鍼以拯天狂帝王世記王冰曰天元冊所謂記天真元氣  
運行之紀也自神農之世思史區十世祖始誦而行  
之此太古占候靈文洎乎伏羲之時已鑄諸玉啟命  
曰冊文太古靈文故命曰太始天元冊也素問次註  
炎帝神農氏姜姓母曰女登有嬌氏之女為少典妃  
感神龍而生炎帝人身牛首長於姜水因以為姓火  
德王故曰炎帝以火名官斲木為耜揉木為耒耨耨  
之用以教萬人始教耕故號神農氏於是作蜡祭以  
赭鞭鞭草木始嘗百草始有醫藥補史記

赭鞭之事又出搜神記

通明嶺上 安期海邊

隱居先生在乎茅山巖嶺之上以吐納餘暇頗遊意  
方技覽本草藥性以為盡聖人之心故撰而論之名醫別錄自序節畧詔問山中何所有詩山中何所有嶺上多白  
雲只可自怡悅不堪持贈君陶貞白集通明陶弘景字  
安期先生者琅琊阜鄉人也賣藥海邊時人謂之千  
歲公李少君大山採藥病內殆死遇安期安期與之  
神樓散服一錢匕遂愈秦始皇聞之召見與語三日  
三夜賜金璧數千萬出於阜鄉亭皆置之而去列仙傳  
李譔博好 呂廣重編

按名醫  
圖有呂  
博無呂  
廣階人  
或避煬  
帝諱相  
襲以不  
改毀

李譔字欽仲梓潼涪人也講論義理通五經諸子無  
不該覽加博好技藝美術卜數醫藥弓弩機械之巧  
皆致思焉延熙元年後主立太子以譔為庶子遷為  
僕射轉中散大夫右中郎將蜀志

呂廣吳人為太醫令重編難經醫學源流

奉真三日 德秀二年

宋四明僧奉真良醫也天章閣侍制許元為江淮發  
運使奏課于京師方欲入對而其子病亟暝而不食  
惛惛欲逾宿矣使奉真視之曰脾已絕不可治死在  
明日元曰觀其病勢固知其不可救今方有事須陞

對能延數日之期否奉真曰如此自可諸藏皆已衰  
唯肝臟獨過脾為肝所勝其氣先絕一臟絕則死若  
急瀉肝氣令肝氣衰則脾少緩可延三日過此無術  
也乃投藥至晚乃能張目精稍復啜粥明日漸獲而  
能食元甚喜奉真笑曰此不足喜肝氣暫舒爾無能  
為也後三日果卒夢溪筆談

梁武帝九錫之出而尚書右僕射范雲忽中疾居二  
日半召醫徐文伯視之文伯曰緩之一月乃復欲速  
即時愈政恐二年不復可救雲曰朝聞夕死而况二  
年文伯乃下火而牀焉重衣以覆之有頃流汗於此

即起二年果卒南史德秀文伯字

鳳網百花 斬邵五石

鳳網者漢陽人也常採百草花水漬之瓮盛封泥自正月始迄九月末又取瓮埋之百日煎丸之卒死者以此藥內口中水下之皆生服網藥者非但疾差數百歲不死後入地肺山仙去也神仙傳

靳邵不知何許人也性明敏有才術本草經方誦覽無不通究裁方治療意出眾見創置五石散舉石散方晉朝士大夫無不服餌獲異効焉醫說

時珍鐵落 與正金液

明李時珍曰按素問病能論云帝曰有病怒狂者此病安生岐伯曰生於陽也帝曰陽何以使人狂岐伯曰陽氣者因暴折而難決故善怒也病名曰陽厥帝曰何以知之岐伯曰陽明常動巨陽少陽不動不動而動大疾此其候也帝曰治之奈何岐伯曰奪其食即已夫食入於陰長氣於陽故奪其食即已使之服以生鐵落為飲夫生鐵落下氣疾也此素問本文也愚嘗釋之云陽氣拂鬱而不得疎越少陽膽木挾三焦少陽相火巨陽陰火上行故使人易怒如狂其巨陽少陽之動脈可診之也奪其食不使胃火復助其

邪也飲以生鐵落金以制木也木平則火降故曰下氣疾也速氣即火也本草細目

宋唐與正少年得脉法於臨安醫者黃澤繼又得藥法於大學生夏德懋人有奇疾多以意治病吳巡檢病不得前洩卧則微通立則不能消滴醫通用通小腸藥窮技巧弗驗唐因其姪孫大用來問吳常日服何藥曰叔祖常服黑錫丹問何人結砂曰自為之唐洒然悟曰是必結砂時鉛不死硫黃飛去鉛砂入膀胱卧則偏重猶可洩立則正塞水道以故不能通令取金液丹三百粒分為十服煎瞿麥湯下之膀胱得

硫黃積鉛成灰從水道下猶累累如細砂病遂愈醫說  
楊介存真 叔和診脉

存真圖一卷晁氏曰皇朝楊介撰崇寧間泗川刑賊於市郡守李夷行遣鑿併畫工徃親決膜摘育曲折圖之盡得纖悉介校以古書無少異者比歐希範五臟圖過之遠文獻通考

林億等脉經劄子云臣等承詔典校古醫經方書所按讐中脉經一部乃王叔和之所撰集也叔和西晉高平人性度沈靖尤好著述博通經方精意診處洞識修養之道其行軍具唐甘伯宗名醫傳中臣等觀



其書叙陰陽表裏辨三部九候分人迎氣口神門條  
 十二經二十四氣奇經八脉以舉五藏六府三焦四  
 時之病若網有條而不紊使人占外以知內視死而  
 別生為至詳悉王叔和脉經自序云脉理精微其體  
 難辨弦緊浮芤展轉相類在心易了指下難明謂沈  
 為伏則方治永乖以緩為遲則危殆立至况有數候  
 俱見異病同脉者乎書本

掌林校正劉馬墨白

宋掌禹錫郾城人以尚書工部侍郎致仕博學多記  
 嘗預脩皇祐方與尚書祠部郎中秘閣校理林億太

常博士集賢校理蘓頌殿中丞秘閣校理張洞殿中  
 丞陳檢光祿寺丞高保衡等奉詔校正神農本草靈  
 樞太素甲乙經素問之類及康濟千金外臺秘要等  
 方禹錫尋奏置局刊校并乞領醫官秦宗古朱有章

撰嘉祐補注本草大明一統志

宋太祖開塞六年命尚藥奉御劉翰道士馬志等九  
 人取唐蜀本草詳校仍取陳藏器拾遺諸書相參刊  
 正別名增藥一百三十三種馬志為之註解翰林學  
 士盧多孫等刊正七年復詔志等重定學士李昉等  
 者詳凡神農者白字名醫所傳者墨字別之并目錄

共二十一卷

本草序例

崔或恭儉 自化養頤

後魏崔或字文若東武城人也善醫術性仁恕官至冀州別駕子景哲亦以醫術知名累官司徒長史景哲子罔仕北齊官至鴻臚卿臨終戒其子曰夫恭儉福之興傲侈禍之機乘福輿者浸以康寧蹈禍機者忽傾覆汝其戒哉吾沒後斂以時服祭無牢餼棺足周屍座不泄露而已及卒長子修遵父命景哲弟景鳳字叔鸞位尚藥典御

後魏書

宋趙自化德州平原人高祖嘗為景州刺史後舉家

陷契丹父知崑脫身南歸寓居洛陽習經方名藥之術又以授二子自正自化周顯德中偕來京師悉以醫術稱會秦國長公主疾有薦自化診候者疾愈表為醫學再加尚藥奉御淳化五年授醫官副使所撰有四時養頤錄為獻真宗改名調膳攝生圖仍為製序嘗續自古以方技至貴仕者為名醫顯秩傳三卷

宋史

徐登東流 桑君上池

後漢徐登者閩中人也本女子化為丈夫善為巫術又趙炳字公阿東陽人能為越方時遭兵亂疾疫大

起二人過於烏傷溪水之上遂結言約共以其術療病各相謂曰今既同志且可各試所能登乃禁溪水水為不流炳復次禁枯樹樹即生黃二人相視而笑共行其道焉登年長炳師事之貴尚清儉禮神唯以東流水為酌劑桑皮為脯但行禁架所療皆除後漢書

桑君事見越人六不下

滕康龍伏 劉涓子遺

石藏用近世良醫也一士人嘗因承簷溜盥手覺為物觸入指爪中初若絲髮然既數日稍長如線伸縮不能如常始悟其為龍伏藏也乃見石藏用扣其治

療之方藏用曰此方書所不載也當以意去之歸可末蟻螂塗指庶不深入胃膜冀他日免震厄之患士人如其言後因迅雷見大光遍身士人懼急以鍼穴指果見一物自針穴所躍出不能為災李定云滕樞密翰苑叢記宋樞密睢陽滕康子濟撰翰苑叢記五卷文獻

考通

劉涓子不知何許人晉末於丹陽郊外夜射忽有一物高二丈許因射而中之走如電激聲若風雨夜不敢追明日率門人弟子鄰巷數十人尋其蹤跡至山下見一小兒問曰何姓小兒云主人昨夜為劉涓子

所射取水以洗瘡因問小兒主人是誰答曰是黃父  
鬼乃將小兒還未至聞搗藥聲見三人一人卧一人  
開書一人搗藥即齊聲叫突而前三人並走遺一帙  
癰疽方并一白藥時消子得之從宋武帝北征有被  
瘡者以藥塗之隨手而愈論者謂聖人作事天必助  
之蓋天以此授武帝也消子用方為治千無一失演  
為十卷號曰鬼遺方龔慶宣鬼遺方序

仇氏肇端 巫彭初醫

仇貸季神農時臣也岐伯祖之師神農立方書乃命  
仇貸季理色脉對察和劑摩踵訛告以利天下而人

得以繕其生史路岐伯曰色脉者上帝之所貴也先師

之所傳也上古使仇貸季理色脉而通神明素問醫之

端肇於此醫學入門

殷巫彭初作醫說文巫彭始作醫呂氏春秋

玄晏甲乙 東園子午

晉皇甫謐字士安幼名靜安定人居貧年二十始感  
激讀書帶經而鋤博通典籍百家之言沈靜寡慾而  
始有高尚之志以著述為務自號玄晏先生或有箴  
其過篤將損耗其精神謐曰朝聞道夕死可矣况命  
之修短分定懸天乎後得風痺疾猶手不輟卷或勸

謚修名廣交謚作玄守論晉名醫圖贊曰皇甫士安

治法千般經言甲乙造化寔難醫學源流

宋陸蒙號東園散人博學經史精篆隸遇異人得子

午按摩法療疾不施於鍼灸對坐談笑頃疾即脫未

嘗須人直或勸其仕則嘿不應醫學入門

郝翁雪玄 李生雲母

宋皇祐中學究任道腿間患一瘡始發赤腫後絕復

變黑後穴則有黃水出四邊浮漿起累治不差醫王

通看之此瘡狹長似魚臍丁瘡也遂以大鍼鍼四向

并中隨鍼有紫赤水汁出如豆汁言此一因風毒滲

結而成二因久坐血氣凝澁而致三因食肉有人汗

落其間也道曰素好讀書而久坐此疾數歲前夏月

道中買猪脯味水飯疑似人肉食已後得斯疾通曰

與誤食人汗不遠矣以一異散子用雞子清調傳其

瘡日三易數日得愈道堅求其方通曰止用雪玄一

味自後累訪名醫求其雪玄何物醫皆不識道因至

許鄭間會醫者郝老曰嘗記聖惠有一方治此疾用

臘月猪頭燒灰以雞子清調傳此乃是也雪玄非郝

老博學多記後醫豈不惑耶名醫錄

宋楊介吉老泗州人以醫術聞四方有儒生李氏子

棄業願娶其女以授其學執子婿禮甚恭吉老盡以精微告之一日有靈璧縣富家婦有疾遣人邀李生以往李初視脉曰腸胃間有苦邪婦曰腸中痛不可忍而大便從小便中出醫者皆以謂無此證不可治故欲屈子李曰試為籌之若姑服我之藥三日當有瘳不然非某所知也下小丸子數十粒煎黃芪湯下之富家依其言下膿血數升而愈富家大喜贈錢五十萬置酒而問之曰始切脉時覺孔脉現於腸部王叔和脉訣云寸孔積血在胸中關內逢孔腸裡癰此癰生腸內所以致然所服者乃雲母膏為丸兩切脉

至此可以言醫矣李後以醫科及第至博士李植元秀即其從子也

王明清餘話

董仙土窟 許氏靈府

董奉吳候官人也時交州刺史杜燮中毒藥而死奉以太一散和水沃燮口中須臾乃蘇燮自說初死時有一車門直入一處內燮於土窟中以土塞之俄頃聞太一使至追杜燮遂開土窟燮得出神仙傳許智藏使詣揚州會秦考王俊有疾上馳召之俊夜中夢其亡妃崔氏泣曰本來相迎如聞許智藏將至其人若到當必相苦為之奈何明夜俊又夢崔氏曰

妾得計矣當入靈府中以避之及智藏至為俊診脉曰疾已入心即當發癩不可救也果如言俊數日而薨上奇其妙賚物百段隋書

劉敏書屏以潛閉戶

明劉敏字德美號益齋長洲人幼孤業儒究精醫道士夫薦於朝雖功不自銜嘗慕古人開卷有益之言書屏以自警古今醫統

明沈以潛明醫沈繹之姪以醫名家宣德間徵入為醫士未甚知名大醫蔣武病革上遣中使問之曰卿既死誰可代者用文書以潛名進即擢為御醫進對

稱旨上謂用文能知人以潛為不負所舉矣謠言騎驢教學張公瑾閉戶行醫沈以潛續醫說

立言錄驗 仲化發微

唐甄立言權之身也仕為大常丞杜淹苦流腫帝遣視曰去此十日午漏上且死如之有道人心中腹懣煩彌二歲診曰腹有蟲誤食髮而然令餌雄黃一劑少選吐一蛇如拇無目燒之有髮氣乃愈唐書撰有本草音義七卷古今錄驗方五十卷行於世古今醫統

明馬蒔字仲化號玄臺會稽人少游諸生間久躋場屋患弱疾季父刺史白峯公命更醫醫更精也名益

明醫小史江都鹿門先生撰

藉藉聞諸侯矣獨慨軒岐之旨不能炳如日星判若淄澠而按方泥經之失每每忘本根而攻枝葉以致失于膏肓于天地之和為害非少遂研精覃思著內經註證發微明醫小史

劉氏青華 葛生白衣

劉無名常於庚申日守三尺食雄黃後見一鬼使曰我泰山直符來攝君見君頂上黃光數尺不可近得非雄黃之功乎因曰一金一石謂之丹君服其石更餌其金則黑籍落名青華定籙劉後遇青華真人授以丹訣以鉛為君以汞為臣八石為使黃牙為田金

密記

葛生能治五絕病屢活人命人或問其神術所自得葛生曰我因入山採藥遇白衣人問曰汝非葛醫生否我乃半夏之精汝遇人有五絕病用我救治即活但用我作末水丸令乾入鼻中即生矣所謂五絕者一曰自縊死氣已絕二曰墻壁屋崩壓死氣已絕三曰溺水死氣已絕四曰鬼魔死氣已絕五曰產乳死氣已絕名醫錄

劉郎避穀 張女不饑

晉惠帝永寧二年黃門侍郎劉景先表奏臣遇太白

醫學



山隱氏傳濟饑辟穀仙方臣家大小七十餘口更不食別物若不如斯臣一家甘受刑戮其方用大豆五斗淘淨蒸三遍去皮用大麻子三斗浸一宿亦蒸三遍令口開取仁各搗為末和搗作團如拳大入甑內蒸從戌至子時止寅時出甑午時晒乾為末乾服之以飽為度不得食一切物第一頓得七日不饑第二頓得四十九日不饑第三頓得三百日不饑第四頓得二千四百日不饑更不必服永不饑也不問老少但依法服食令人強壯容貌紅白永不憔悴口渴即研大麻子湯飲之轉更滋潤臟腑若要重喫物用葵

子三合研末煎湯冷服取藥如金色任喫諸物並無所損前知隨州朱頌教民用之有驗序其首尾勒

石於漢陽大別山太平興國寺

王氏農書

太丘長顓川陳仲弓篤論士也撰異聞記云其郡人張廣定者遭亂嘗避地有一女年四歲不能步陟又不可擔負計棄之固當餓死不欲令其骸骨之露村口有古大塚上巔先有穿穴乃以器盛糞之下此女於塚中以數月許乾飯及水漿與之而捨去候世平定其間三年廣定乃得還鄉里欲收塚中所棄女骨更殯埋之廣定往視女故坐塚中見其父母猶識之

甚喜而父母猶初恐其鬼也入就之乃知其不死問  
 之從何得食女言糧初盡時甚饑見塚角有一物伸  
 頸吞氣試効之轉不復饑日月為之以至於今父母  
 去時所留衣被自在塚中不往來衣服不敗故不寒  
 凍廣定乃索女所言物乃是一大龜耳女出食穀初  
 小腹痛嘔逆久許乃習此又足以知龜有不死之法  
 及為道者効之可與龜同年之驗也抱朴子

文垣玄珠 宗厚玉機

明孫一圭字文垣號東宿又號生子新安休寧人自  
 弱冠從黃古潭受丹鉛業精岐黃之術游三吳新都

宜興之間為諸名公所信其治驗奇法卓越於諸子  
 曾著赤水玄珠五十一卷大行于世有泰來明來二  
 子亦知醫明醫小史

明劉純字宗厚閩中人博覽群書尤精醫學父受業  
 於丹溪之門及純醫名大著所纂傷寒治例玉機微  
 義醫經小學行世古今醫統

裴顏權衡 雷敷炮灸

晉裴顏字逸民河東聞喜人弘雅有遠識博學稽古  
 自少知名御史中丞周弼見而歎曰顏若武庫五兵  
 縱橫一時之傑也顏通博多聞兼明醫術荀勗之修

律度也。檢得古尺短世所用四分有餘。願上言宜改諸度量。若未能悉革。可先改大醫權衡。此若違遂失神農岐伯之正藥物。輕重分量乖互。所可傷大為害尤深。古壽而今短折者。未必不由此也。晉書

劉宋時雷斅著炮灸論。自稱內究守國安正公。或是官名也。胡合居士重加定述。藥凡三百種。為上中下三卷。其性味炮灸熬煮修事之法。多古奧。文亦古質。別是一家。多本于乾寧晏先生。其首序論述物理。亦甚幽玄。乾寧先生名晏封。著制伏草石論六卷。蓋丹石家書也。本草序例

元禎誑給 趙卿權詐

唐吳元禎京城醫人也。治一婦人從夫南中。還曾誤食一蟲。常疑之。由是致疾。頻治不減。請吳醫治之。吳揣知其所患。乃請主人姨姝中謹蜜者一人。預戒之曰。今以藥探吐。但以盆盂盛之。當吐之時。但言有一小蝦蟇走去。然切不可令病人知之。是誑給也。其姝僕如約。此疾頓除。北夢瑣言

宋趙卿良醫也。有機警。一少年眼中嘗見一小鏡子。諸醫不效。卿視之。與少年期來晨以魚鱸奉候。少年及期赴之。延以內。且令從容。俟客退。方接俄設臺施。

一甌芬醋更無他味卿亦未出迨禺中久候不至少年飢甚且聞醋香不免輕啜之遂巡又啜之覺胸中豁然眼花不見因竭啜之卿知之方出少年以啜醋慙謝卿曰郎君先因食贈太多芬醋只欲郎君因飢以啜之果愈此疾烹鮮之會乃權詐也醫說

仲遠仁利 明祐補瀉

明陸仲遠九華山人挾倉公扁鵲之技常曰醫家之書近於仁醫家之事近於利苟不志於利仁者心也醫學入門

明程明祐字良吉號岩泉歛人梁忠公莊公之後幼

好學玩理後攻醫嘗曰人皆知補之為補而不知瀉之為補知瀉之為瀉而不知補之為瀉陰陽迭用剛柔互體故補血以益榮非順氣則血凝補氣以助衛非活血則氣滯蓋脾為中州水火交濟而後能生萬物真妙論也同上

孝緒人葭 盧絳甘蔗

梁阮孝緒字士宗陳留尉氏人也母王氏忽有疾兄弟欲召之母曰孝緒至性冥通必當自到果心驚而返鄰里嗟異之合藥須得生人葭舊傳鍾山所出孝緒躬歷幽險累日不值忽見一鹿前行孝緒感而隨

按源順和名鈔人參稱鹿之逃草是原於阮孝緒傳歟

後至一所遂滅就視果獲此草母得服之遂愈時皆歎其孝感所致書

南唐盧絳病疔疾夢白衣婦人頗有姿色歌菩薩蠻勸紅卮酒歌畢曰子之食蔗即愈詰朝求蔗食之果

癯南唐書

### 廖氏丹井 莫子水盤

臨沅縣廖氏家世世壽考後徙去子孫多夭折他人居其故宅復多壽考疑其井水赤乃掘之得古人埋丹砂數十斛飲此水而得壽况鍊服者乎抱朴子隋莫君錫不知何郡人大業中為大醫煬帝晚年尤

迷於色方士進大丹帝服之而陽過盛燥日飲水百杯而渴不止君錫奏為置冰於帝前日夕望之而渴遂止醫醫學入門冰作水盤

### 洪蘊紫袍 國禎寶鞍

宋沙門洪蘊本姓藍潭州長沙人母媪初以無子專誦佛經既而有妊生洪蘊年十三詣郡之開福寺沙門知己求出家習方技之書後遊京師以醫術知名太祖召見賜紫袍號廣利大師太平興國中詔購醫方洪蘊錄古方數十以獻真宗在蜀邸洪蘊嘗以方藥謁見咸平中補右街首座累轉右街副僧錄洪蘊

尤工診切每先歲時言人生死無不應湯劑精至貴  
戚大臣有疾者多詔遣診療景德元年卒年六十八  
宋史

元許國禎字進之曲沃人博通經史尤精醫術祖父  
業醫金末辟地高州後寓大原元世祖在潛邸國禎  
以醫徵至翰海留守掌醫藥伯撒王妃病目治者鍼  
誤損其明世祖怒欲坐以死罪國禎從容諫曰罪固  
當死然原其情乃恐怖失次所致即誅之後誰敢復  
進世祖意解且犒之曰國禎之直可作諫官世祖過  
飲馬湏得足疾國禎進藥味苦却不服國禎曰古人

有言良藥苦口利於病忠言逆於耳利於行已而足  
疾再作召國禎入視世祖曰不聽汝言果困斯疾對  
曰良藥苦口既知之矣忠言逆耳願留意焉世祖大  
悅以七寶馬鞍賜之至元中為禮部尚書卒追封薊  
國公子宸官至大司徒集事淵海

文紀濕麪 師文水糲

明盛文紀以醫名吳中有謝訓導病頭疼發熱惡寒  
初作外感治或以風治見熱則退熱痛則止痛或又  
以氣虛治由是病轉劇人事不省飲食已絕家人意  
其必死謝曰吾病惟盛文紀不曾視脉命其子延至

盛乃診視曰君幾誤死法當先去其滯遂用二陳湯加大黃六七錢令守者曰急煎俾服至夜分左眼若動肝氣乃舒大泄則有可生之機矣至夜半時覺腹中有聲左眼果開遺穢物斗許中有堅硬如卵之狀以竹刀剖視之即痰裏麪食也既而氣舒結散津液流通即索食矣眾醫問故盛曰謝君北人也久居于吳飲酒食麪皆能助濕能傷脾土一虧百病交作有是病服是藥更何疑焉眾醫咸服續醫說

宋黃師文治一婦人卧病垂三年狀若勞瘵名醫皆以虛損治不差師文往視之曰此病食陰物時或遭

大驚也問之其婦方自省悟曰曩者食水烟時忽人報其夫墜水由是一驚病延至今不能愈師文以青木香丸兼以利藥一帖與之須臾下一塊扶之乃痰包一水烟耳北憲發輟

秦氏六不 郭玉四難

扁鵲者勃海郡鄭人也姓秦氏名越人少時為人舍長舍客長桑君過扁鵲獨竒之常謹遇之長桑君亦知扁鵲非常人也出入十餘年乃呼扁鵲私坐間與語曰我有禁方年老欲傳與公公毋泄扁鵲曰敬諾乃出其懷中藥予扁鵲飲是以上池之水三十日當

知物矣乃悉取其禁方書盡與扁鵲忽然不見殆非  
人也扁鵲以其言飲藥三十日視見垣一方人以此  
視病盡見五藏癥結特以診脈為名耳為醫或在齊  
或在趙在趙者名扁鵲人之所病病疾多而醫之所  
病病道少故病有六不治驕恣不論於理一不治也  
輕身重財二不治也衣食不能適三不治也陰陽并  
藏氣不定四不治也形羸不能服藥五不治也信巫  
不信醫六不治也有此一者則重難治也扁鵲名聞  
天下過邯鄲聞貴婦人即為帶下醫過洛陽聞周人  
愛老人即為耳目癩醫來入咸陽聞秦人愛小兒即

為小兒醫隨俗為變

史記

後漢郭玉者廣漢雒人也初有老父不知何出常漁  
釣於涪水因號涪翁乞食人間見有疾者時下鍼石  
輒應時而效乃著針經診脈法傳於世弟子程高尋  
求積年翁乃授之高亦隱跡不仕玉少師事高學方  
診六微之技陰陽不測之術和帝時為大醫丞多有  
效應帝奇之仍試令嬖臣美手腕者與女子雜處帷  
中使玉各診一手問所疾苦玉曰左陽右陰脈有男  
女狀若異人臣疑其故帝歎息稱善玉仁愛不矜雖  
貧賤廝養必盡其心力而醫療貴人時或不愈帝乃



令貴人羸服變處一鍼即差召玉詰問其狀對曰醫之為言意也賤理至微隨氣用巧鍼石之間毫芒即乖神存於心手之際可得解而不可得言也夫貴者處尊高以臨臣臣懷怖懾以承之其為療也有四難焉自用意而不任臣一難也將身不謹二難也骨節不强不能使藥三難也好逸惡勞四難也鍼有分寸時有破漏重以恐懼之心加以裁慎之志臣意且猶不盡何有於病哉此其所為不愈也帝善其對年老卒官後漢書

法衛二帝 温叟三婦

梁武帝嘗因發熱欲服大黃僧垣曰大黃乃是快藥然至尊年高不宜輕用帝弗從遂至危篤梁元帝嘗有心腹疾乃召諸醫議治療之方咸謂至尊至貴不可輕脫宜用平藥可漸宣通僧垣曰脉洪而實此有宿食非用大黃必無差理帝從之進湯訖果下宿食因而疾愈帝大喜周書法衛僧垣字宋潘豫字温叟名醫也張咸之妻孕五歲富昌齡妻孕二歲劉彝孫妾孕十有四月皆未育温叟視之曰疾也凡醫妄指以為有妊爾於是作大劑飲之張妻墮肉塊百餘有眉目狀富妻夢二童子色漆黑倉卒

怖悸疾走而去劉妾墮大蛇猶蜿蜿不死三婦皆無  
急也醫說

守真美酒 潔古大斧

金劉完素字守真河間人嘗遇異人陳先生以酒飲  
守真大醉及寤洞達醫術若有授之者乃撰運氣要  
旨論醫方精要素問藥證傷寒直格宣明論五卷慮  
庸醫或出妄說又著素問玄機原病式一卷特舉二  
百八十八字註二萬餘言然好用涼劑以降心火益  
腎水為主自號通玄處士云史金酒作美酒保命集  
自序  
金張元素字潔古易州人八歲試童子舉二十七試

按保命集劉完素撰而李時珍斷為張潔古所著

經義進士犯廟諱下第乃去學醫無所知名夜夢有  
人用大斧長鑿鑿心開竅納書數卷於其中自是洞  
徹其術元素治病不用古方其說曰運氣不齊古今  
異執古方新病不相能也自為家法史金

穰子盡告 宋生優主

宋穰子瞻曰脉之難明古今所病也至虛有盛候大  
實有羸狀差之毫釐疑似之間便有生死禍福之異  
此古今所病也疾不可不謁醫而醫之明脉者蓋少  
夫輪扁不時有天下未嘗徒行和扁不世出病者終  
不徒死亦因其長而獲其短耳士大夫多秘所患以

求診驗醫之能否索病於冥漠之中辨虛實冷熱於疑似之間醫不幸而失不肯自謂失之也則巧飾遂非以全其名至於不救其固難治也間有馴慝者或用主人之言亦須參以所見兩存而雜治以故藥不效此世之患而莫之悟也吾平生求醫必於平時默驗其工拙至於有病必先盡告以所患而後求診使醫了然知患之所在然後求之脉虛實冷熱先定於胸中則脉之疑似不能亂也故雖中醫治吾疾常愈吾求病愈而已豈以醫為事哉

林志

宋清長安西都藥市人也居善藥有自山澤來者必

歸宋清氏清優主之長安醫工得清藥輔其方輒易  
 雖咸譽清疾病疔瘍者亦皆樂就清求藥冀速已清  
 皆樂然響應雖不持錢者皆與善藥積券如山未嘗  
 詣取直或不識遙與券清不為辭歲終度不能報輒  
 焚券終不復言市人以其異皆笑之曰清蚩妄人也  
 或者曰清其有道者歟清聞之曰清逐利以活妻子  
 耳非有道也然謂我蚩妄者亦謬

柳柳州集

川父醫史

寧極藥譜

明李濂字川父祥府人舉正德八年鄉試第一明年  
 成進士授沔陽知州稍遷寧波同知擢山西僉事嘉

靖五年以大計免歸年纔三十有八漁少負俊才時  
 從俠少年聯騎出城搏獸射雉酒酣悲歌慨然慕信  
 陵君侯生之為人一日作理情賦友人左國璣持以  
 示李夢陽夢陽大嗟賞訪之吹臺漁自此聲馳河雒  
 間既罷歸益肆力於學遂以古文明於時受知夢陽  
 後不肩附和里居四十餘年著述甚富明史撰有醫  
 史十卷

輟耕錄  
又載此  
事

必芻清本良於醫藥數百各以角貼所題名字詭異  
 余大駭究其源底答言天成中進士侯寧極戲造藥  
 譜一卷盡出新意改立別名因時多難不傳于世余

以禮求假錄一通用娛閑暇○假君子牽淡伯厚朴

遺老陳皮九日三官吳茱萸曲方氏防風苦督郵黃芩

既濟公升麻抱雪居子香附玲瓏藿去病藿香草兵

巴豆無聲虎大黃女二天當歸皺面還丹人參禹孫

澤瀉錦繡根芍藥蘆頭豹子柴胡偷蜜珊瑚甘州綠

斂真人菖蒲正坐丹砂附子洞庭奴隸枳殼火泉竹

瀝不死麪茯苓茅君蜜蕊蒼朮清異錄原載百九  
十種今錄一二

陳子食性 巢氏病源

食性本草掌禹錫曰南唐陪戎副尉劍州醫學助教  
 陳子良撰取神農陶隱居蘓恭孟詵陳藏器諸家藥

食醫  
周禮

關於飲食者類之附以食醫諸方及五時調養臟腑之法時珍曰書九十卷總集舊說無甚新義古有淮南王食經一百二十卷崔浩食經九卷竺暄食經十卷膳饌養療二十卷咎殷食經心鑑三卷婁居中食治通說一卷陳直奉親養老書一卷並有食治諸方皆祖食醫之意本草序例

巢氏病源候論五十卷隋巢元方等撰元方大業中被命與諸醫共論眾病所起之源皇朝舊制監局用此書課試醫生昭陵時詔校本刻牘頒行宋授為序陳氏曰元方隋大醫博士其書惟論病證不載方藥

按醫說  
無背字  
任之作  
任子尸  
子作尹

今按千金方諸論多本此書業醫者可以參考文獻通考  
醫詢委制 苗父祝言

醫詢者秦之良醫也為宣王割產為惠王療疾皆愈張子之背腫命詢治之張子謂之曰背非吾背任之制焉治之遂愈詢誠善治疾也張子委制焉夫身之與國而猶如此也必有所委然後治之子  
上古之為醫者曰苗父苗父之為醫也以管為席以芻為狗北面而祝發十言耳諸扶而來者與而來者皆平復如故說苑

藏器拾遺 損之刪繁

本草拾遺唐開元中三原縣尉陳藏器撰以神農本  
 經雖有陶蘓補集之說然遺沈尚多故別為序例一  
 卷拾遺六卷解紛三卷總曰本草拾遺本草  
序例  
 刪繁本草唐潤州醫博士兼節度隨軍揚損之誤刪  
 去本艸不急及有名未用之類為五卷開元以後人  
 也無所發明同上

子豫赤丸 文子朱熹

晉李子豫者少善醫方當代稱其通靈許永為豫州  
 刺史鎮歷陽其身患心腹疼痛十四年殆死忽夜聞  
 屏風後有鬼謂腹中鬼曰何不速殺之不然李子豫

按羅天  
 益以八  
 毒赤丸  
 子治鬼  
 症之車  
 山名醫  
 類案

當從此過以赤丸打汝汝其死矣腹中鬼對曰吾不  
 畏之及旦許永遂使人候子豫果來未入門病者自  
 聞腹中有呻吟聲及子豫入視曰鬼病也遂於巾箱  
 中出八毒赤丸子與服之須臾腹中雷鳴彭轉六利  
 數行遂差今八毒丸方是也後搜神  
記  
 崔文子者秦時太山人也志好黃老事居潛山下後  
 作黃散赤丸藥賣之都市自言年三百餘歲後有疫  
 氣人死者萬萬許長史請文子救之文子擁朱熹繫  
 黃散以巡人間飲散服丸即愈所活者以萬計其後  
 公之蜀賣藥故世人云崔文子赤丸黃散近於神也

列仙傳

魏澹議都秦和醫國

後魏周澹京兆鄠人也多方術尤善醫藥為太醫令

太宗明嘗苦風頭眩澹治得愈由此見寵位至特進

賜爵成德侯神瑞二年京師饑朝議將遷都於鄴澹

與博士祭酒崔浩進計論不可之意太宗大然之曰

唯此二人與朕意同詔賜澹浩各一人御衣一襲

絹五十疋綿五十斤

後魏書

晉平公有疾秦景公使醫和視之出曰疾不可為也

是謂遠男而近女惑以生蠱非鬼非食惑以喪志良

臣不生天命不佑若君不死必失諸侯趙文子聞之

曰武從二三子以佐君為諸侯盟主於今八年矣內

無苛慝諸侯不二子胡曰良臣不生天命不佑對曰

自今之謂和聞之曰直不輔曲明不規闇搖木不生

危松柏不生埤吾子不能諫惑使至於生疾又不自

退而寵其政八年之謂多矣何以能久文子曰醫及

國家平對曰上醫醫國其次疾人固醫官也

國語

士瀛直指從周自得

宋楊士瀛字登父福州三山人號仁齋宋理宗景定

中人著直指方活人總括嬰兒秘要等書刊行

醫學源流

宋劉從周韶州曲江人妙於醫術有自得之見著書十篇大抵與世俗異論痢疾以手足和煖為熱厥冷為寒如盛夏發熱有進退者為冒暑一向熱不止者為傷寒至當之言也

醫說

度卿暗解 昭遇默識

明殷渠字度卿號方山儀真人家世名醫讀軒岐書暗解默誦診脉用藥以意消息不尚奇怪

醫學入門

宋陳昭遇嶺南人善醫隨劉鋹歸朝後為翰林醫官所治疾多愈世以為神醫絕不讀書詰其所習不能答嘗語所親曰我初來都下持藥囊抵軍壘中日閱

數百人知其風勞冷氣之候皆默識之然後視其老幼虛實按古方用湯劑鮮不愈者實未嘗尋脉訣也

皇朝類苑

致和楮帛 夫徵首飾

吾鄉張御醫致和為人治疾有召即往往則必為之盡力一日有老媪拜於途泣而告曰妾有子病瀕於死貧無藥資公能恤之乎致和忻然往視其脉授以藥又封裹數服囑之曰旬日之後啓之及愈啓其封乃楮帛也媪往問之致和曰若子之疾積憂所致耳今雖愈安知不以貧苦而復作也吾為此計欲慰爾



子之心俾爾衰年有所倚賴耳。母子感泣拜謝而去。迨時陳聘夫徵先君至友也。博通諸家醫書。融會精微。處方制劑。率與眾異。每應人之求。不擇貧富。嘗有一婦人產後得奇疾。邀陳療治。願以首飾三十金致謝。陳許諾。及病瘥。其夫置酒。携所約之物至。陳曰。前所以相諾者。欲取信於君之夫婦也。首飾乃婦人所愛。吾安忍取之。邪。固却之。而本意世之乘危射利之徒。聞二公之行。其類得無有此乎。續醫說

韋氏藥王 孫公聖童

唐韋慈藏者京兆人。天后時以醫術知名。仕為光祿

卿。醫說藥王姓韋氏。名訊。道號慈藏。醫中之聖。靈應如

神。人皆仰之。今醫家皆圖繪其像而祀之。名醫圖贊

云。大唐藥王。德號慈藏。老師韋訊。萬古名揚。醫學源流

唐孫思邈。京兆華原人。通百家說。善言老子莊周。周

洛州總管。獨孤信見其少異之。曰。聖童也。顧器大難

為用。爾及長。居太白山。隋文帝輔政。徵為國子博士。

召不拜。密語人曰。後五十年。當有聖人出。吾且助之。

太宗初。召詣京師。年已老。而聽視聰瞭。帝歎曰。有道

者。欲官之。不受。顯慶中。復召見。拜諫義大夫。又固辭。

上元元年。稱疾還山。高宗賜良馬。假鄱陽公主邑司。

以居之思邈於陰陽推步醫藥無不善孟詵盧照隣等師事之照隣有惡疾不可為感而問曰高醫愈疾奈何對曰天有四時五行寒暑迭居和為雨怒為風凝為雪霜張為虹蜺天常數也人之四肢五藏一覺一寢吐納往來流為榮衛章為氣色發為音聲人常數也陽用其形陰用其精天人所同也失則烝生熱否生寒結為瘤贅陷為癰疽奔則為喘乏竭則為焦槁發乎面動乎形天地亦然五緯縮贏字彗飛流其危診也寒暑不時其烝否也石立土踊是其瘤贅山崩土陷是其癰疽奔風暴雨其喘乏川瀆竭涸其焦

槁高醫導以藥石救以砭劑聖人和以至德輔以人事故體有可愈之疾天有可振之災又曰膽欲大而心欲小智欲圓而行欲方初魏徵等修齊梁周隋等五家史屢咨所遺其傳最詳永淳初卒年百餘歲遺令薄葬不藏冥器祭太牲牢自註老子莊子撰千金方三十卷行於世又撰福祿論三卷攝生真錄及枕中素書會三教論各一卷子行天授中為鳳閣侍郎

唐書

文仲風氣 叔展窳窮

唐張文仲者洛州洛陽人少與鄉人李虔縱京兆人

韋慈藏並以醫知名則天時為御醫特進蘇良嗣於殿庭因拜跪便絕倒則天令文仲慈藏至宅候之文仲曰此因憂憤邪氣激也若痛衝脇則劇難救自朝候之未及食時即苦衝脇絞痛文仲曰若入心即不可療俄頃心痛不復下藥日時而卒文仲論風與氣尤精曰風狀一百二十四氣狀八十治不以時則死及之惟頭風與足氣藥可常御病風之人春秋末月可使洞利乃不至困劇自餘須發則治以時消息乃著四時輕重術凡八十八種隨身備急方三卷唐書楚子伐蕭遂傳於蕭還無社與司馬卯言號申叔展

叔展曰有麥麩乎曰無有山鞠窮乎曰無河魚腹疾奈何曰目於眚井而拯之若為茅經哭井則已明日蕭潰申叔見其井則茅經存為號而出之左傳本事方鞠窮圓條下云左氏述楚子圍蕭蕭將潰申叔展告還無社曰有麥麩乎有山鞠窮乎鞠窮芎窮也意欲令逃水中以避禍是知芎窮能除濕予嘗加木附以製方治脾濕而泄者萬無不中書本

熊均大全 實功正宗

明建陽熊均宗立勿軒後人也自幼嬰疾甫十歲受業仁齋劉先生之門天資穎敏書無不讀讀無不通

早承師訓以醫道有活人之功極留心焉乃取古人醫學源流所著方書會同一選始於風寒暑濕終於小方脉科釐為二十四卷名曰醫書大全醫書大全序明陳實功字毓仁號若虛子崇川人謂醫之內外治外較難于治內何者內之症或不及其外外之症則必根于其內者也此而不得其方膚命之疾亦膏肓之莫救也研精此業萬曆四十三年著外科正宗微至疥癬亦無所遺明醫小史

繆雍經疏 韓懋醫通

明繆希雍字仲淳海虞故家子多僑寓所至稱高公

豪爽自負岐黃之訣徃徃生死人攘臂自快不索謝上自名公卿下至卑田院乞兒直平等視故索方者日益相知著神農本草經疏十二卷明醫小史

明韓懋號飛霞道人西蜀武弁世家道人心在仁愛好讀詩書上慕太古高尚之風精究醫藥活人之術所著痰火等論二卷有以發先聖之蘊世傳韓氏醫

通云古今醫統

道君總錄 明皇廣濟

宋徽宗皇帝御製序萬機之餘著書四十二章發明內經之妙曰聖濟經其意精微其旨邁遠其所言在

理所以探天下之至順亦詔天下以方術未上并御  
府所藏領之為補遺一卷治法一卷卷凡二百方幾  
二萬以病分門門各有論而叙統附焉首之以風疾  
之變動終之以神仙之服餌詳至於俞穴經絡祝由  
符禁無不悉備名之曰政和聖濟總錄云徽宗後為  
教主道君皇帝聖濟總錄序

唐玄宗皇帝好醫藥道術開元中親撰廣濟方五卷  
領于天下令諸州置醫博士一人天寶五載八月癸  
未詔廣濟方令郡縣長吏選其要者錄于大板以示  
坊村又製單方藥圖唐書

仙伯七方 徐王十劑

岐伯曰氣有高下病有遠近證有中外治有輕重適  
其至所為故也大要曰君一臣二奇之制也君二臣  
四偶之制也君二臣三奇之制也君三臣六偶之制  
也故曰近者奇之遠者偶之汗者不以偶下者不以  
奇補上治上制以緩補下治下制以急急則氣味厚  
緩則氣味薄適其至所此之謂也病所遠而中道氣  
味之者食而過之無越其制度也是故平氣之道近  
而奇偶制小其服也遠而奇偶制大其服也大則數  
少小則數多多則九之少則二之奇之不去則偶之

是謂重方。張從正云王太僕以偶為復方今七方有偶又有復豈非偶乃二方相合復乃數方相合之偶之不去則反佐以取之所謂寒熱溫涼及從其病也。素問黃帝時有仙伯於岐山下號岐伯通鑑徐之才曰藥有宜通補洩輕重澀滑燥濕十種是藥之大體而本經不言後人未述凡用藥者審而詳之則靡所遺失矣。本草徐之才為西陽郡王書

憲藏三品 景源五世

唐貞觀中張憲藏為金吾長嘗因下直歸櫟陽路逢少年畋獵割鮮野食倚樹歎曰張寶藏身年七十未嘗得一食酒肉如此者可悲哉傍有僧指曰六十日

內官登三品何足歎也言訖不見憲藏異之即時還京師時太宗苦於氣痢眾醫不效即下詔問殿庭左右有能治此疾者當重賞之憲藏曾因其疾即具疏以乳煎葷撥方上服之立差宣下宰臣與五品官魏證難之逾月不進擬上疾復發問左右曰吾前飲乳煎葷撥有功復命進之一啜又平因思曰嘗令與進方人五品官不見除授何也證懼曰奉詔之際未知文武二吏上怒曰治得宰相不妨已授三品官我天子也豈不及汝邪乃勸聲曰與三品文官授鴻臚卿時正六十日矣其方每服用牛乳半升葷撥三錢七

同煎減半空心頓服獨異志

宋吳源字德信休寧人號神醫任翰林醫官晚棄官隱於儒嘗曰五世活人功已積一經教子意難忘乾道癸巳冬自診無春脉至期果攝衣而逝醫學源流

仁宗善救 太宗聖惠

慶曆善救方一卷兩朝藝文志詔以福州奏獄醫林士元藥下蠱毒人以獲全錄其方令國醫類集附益八年頒行文獻通考

太平聖惠方一百卷晁氏曰太宗皇帝在潛邸日多蓄名方異術太平興國中內出親驗者千餘首乃詔

慶曆末  
仁宗紀  
號

醫局各上家傳方書命王懷隱王祐鄭彥陳昭遇校正編類各篇首著其疾證淳化初書成御製引同上

赤松冰玉 鄧紹露珠

赤松子神農時雨師服冰玉散教神農服入火不燒至崑崙山上常止西王母石室隨風上下炎帝少女追之亦得仙俱去列仙傳

司農鄧紹八月朔入華山見一童子以五采囊盛取柏葉下露珠滿囊紹問之答曰赤松先生取以明目也今八月朔作露華囊象此也續齊諧記

伯宗姓氏 德用繪圖

唐甘伯宗撰歷代明醫姓氏圖自伏羲至唐凡一百二十人醫學入門繪列成圖醫學源流宋許慎齋又錄唐及五

李宋金及數代之人如通真子劉元賓潔古老人張元素等序次以續于伯宗所作名之曰歷代名醫探

源報本之圖同上

宋丁德用註難經五卷晁氏曰德用以揚玄操所演甚夫大義因改正之經文隱奧者繪為圖德用濟陽

人嘉祐末其書始成文獻通考

鳴鶴腦戶 甄權肩髑

唐秦鳴鶴者為侍醫高宗苦風眩頭重目不能視武

后亦幸災異逞其志至是疾甚召鳴鶴張文仲診之

鳴鶴曰風毒上攻若刺頭出少血即愈矣武后自簾

中怒曰此可斬也天子頭上豈是試出血處耶上曰

醫之議病理不加罪且吾頭重悶殆不能忍出血未

必不佳命刺之鳴鶴刺百會及腦戶出血上曰吾眼

明矣言未畢后自簾中頂禮拜謝之曰此天賜我師

也躬負繒寶以遺鳴鶴醫說

唐甄權者許州扶溝人嘗以母病與弟立言專醫方

得其旨趣隋開皇初為秘書省正字後稱疾免魯州

刺史庫狄嶷苦風患手不得挽弓諸醫莫能療權謂

甄權瘡  
庫狄嶷  
之車又  
出千金  
古



曰但將弓箭向垛一鍼可以射矣鍼其肩隅一穴應時即射果如言貞觀十七年權年一百三歲太宗幸其舍視養訪以藥性因授朝散大夫賜几杖衣服其年卒撰脉經鍼法明堂人形圖各一卷傳于時唐書

元祖割牛 唐皇剪鬚

元布智兒力戰身中數矢太祖親視之令拔其矢血流滿體悶仆幾絕太祖命取一牛割其腹納布智兒于牛腹浸熱血中移時遂甦又郭寶玉胃中流矢太祖命割牛腹置其中少頃乃甦尋復戰說儲唐李勣嘗暴疾醫曰用鬚灰可治帝乃自剪鬚以和

仁宗剪鬚合藥賜呂夷簡之事又出醫說

藥及愈入謝頃首流血帝曰吾為社稷計何謝為唐書

幸靈草木 涪翁漁釣

幸靈者豫章建昌人也性少言與小人群居見侵辱而無愠色邑里號之癡雖其父母兄弟亦以為癡也呂猗母皇氏得痿痺病十有餘年靈療之去皇氏數尺而坐冥目寂然有頃顧謂猗曰扶夫人令起猗曰老人得病累年奈何可倉卒起邪靈曰但試扶起於是兩人夾扶以立少選靈又令去扶即能自行由此遂愈於是百姓奔趣水陸輻湊歸之如雲皇氏自以病久懼有發動靈乃留水一器令食之每取水輒以

新水補處二十餘年，水清如新，塵垢不能加焉。靈所  
 救愈多此類，然不取報謝，行不騎乘，長不娶妻，性至  
 恭，見人即先拜，言輒自名。凡草木之夭傷於山林者，  
 必起埋之，器物之傾覆於途路者，必舉正之。周旋江  
 州間，謂其土人曰：天地之於人物一也，咸欲不失其  
 情性，奈何制服人，以為奴婢乎？諸君若欲享多福，以  
 保性命，可悉免遣之。十餘年間，賴其術以濟者極多，  
 後乃娶妻，畜車馬，奴婢受貨賂致遺，於是其術稍衰，  
 所療得失相半焉。晉書

涪翁事出郭玉四難下

法師獼爪 道士人溺

宋宣和間，天慶觀一法師，行考校極精嚴。時一婦人  
 投狀述，患人有祟所附，須臾召至，附語云：非我為禍，  
 別是一鬼，亦因病人命衰為祟爾。渠今已成形，在患  
 人肺中，為蟲食其肺系，故令吐血聲嘶。師掠之曰：此  
 蟲還，有畏忌否？久而無語，再掠之，良久出，容其說，惟  
 畏獼爪屑為末，以酒服之，則去矣。患家如其言而得

愈。本事方

孟誥必效方：骨蒸發熱，三歲童便五升，煎取一升，以  
 蜜三匙和之，每服二碗半，日更服此。後常取自己小

便服之輕者二十日，重者二十五日，瘥二十日，後當有蟲如蚰蜒在身，常出十步內，聞病人小便臭者，瘥也。台州丹仙觀道士張病，此自服神驗。本草綱目

王貺鍼舌 漢卿剔竅

宋王貺字子亨，本土人，為南京宋毅叔塔叔，既以醫名擅南北。貺初傳其學，未精，薄遊京師，甚悽然。會鹽法忽變，有大賈覩揭示，失驚吐舌，遂不能復入。經旬食不下咽，疴羸日甚。國醫不能療，榜于市曰：有治之者，當以千金為謝。貺應其求，見賈之狀，忽發笑，不能制心，以謂未易措手也。其家人怪而詰之，貺謬為大

言答曰：所笑者，輦轂之大如此，乃無人治此小疾耳。語主人家曰：試取鍼經來，貺謾檢之，偶有穴與其疾，似是者，貺曰：爾家當勒狀，與我萬一不能治，則勿尤。我當為鍼之，可立效。主病者不得已，亦從之。急鍼舌之底，抽鍼之際，其人若委頓狀，頃刻舌遂伸縮如平時矣。其家大喜，謝之如約。又為之，延譽自是翕然。名動京師，既小康，始得盡心。肘後之書，卒有聞於世。王清餘話

明周漢卿松陽人，善鍼灸。治一女子，生瘰癧環頸及腋，凡十九竅，竅破，白瀋出，右手拘攣不可動，身體火

熱漢卿為剔竅母長二寸其餘以火次第焙之數日成茹而愈醫學入門

元珠妙旨 王燾秘要

唐元珠先生不知何許人隱顯莫測惟太僕令王冰識其為異人乃師事之元珠洞明素問究極微奧密授妙旨教王冰五藏六氣修煉養生之法草石性理祛邪去疾諸神方由是冰乃註本經素問至一為醫家宗範神仙傳

外臺秘要方四十卷晁氏曰唐王燾撰燾在臺閣二十年久知洪文館得古方書數千百卷因述諸病證

候附以方藥符禁灼灸之法九一千一百四門天寤中出守房陵及太寧郡故以外臺名其書文獻通考

張暢墓贈 紀朋狔羹

南宋張暢字少微吳郡吳人吳興太守邵兄子也弟牧嘗為獠犬所傷醫云宜食蝦蟇膾牧甚難之暢含笑先嘗牧因此乃食創亦即愈宋書

唐紀朋者開元中人觀人顏色談笑知病淺深不待診脉玄宗聞之召於掖庭中看一宮人每日晨則笑歌啼號若狂疾而足不能履地朋視之曰此必因食飽而大促力頓仆於地而然乃飲以雲母湯令熟寐

覺而失所苦問之乃言因大華公主載誕宮中大陳歌吹某乃主謳惧其聲不能清且長吃牝蹄羹飽而當筵歌大曲曲罷覺胸中甚熱戲於砌臺上高而墜下久而方甦病狂足不能步也名醫錄

蔡謨蟹螯 戴正錫錫

晉蔡謨字通明不知何所人素以儒道自達治莅知名性有道風耽尚醫術常覽本草經方手不釋卷說醫謨渡江見螯蟪大喜曰蟹有八足加以二螯今烹之既食吐下委頓方知非蟹後詣謝尚而說之尚曰卿讀爾雅不熟幾為勸學死說世爾雅曰蝟蟬小者螯

即彭蟪也似蟹而小今彭蟪小於蟹而大於蝟蟬即爾雅所謂蝟蟬也然此三物皆八足二螯而狀甚相類蔡謨不精其小大食而致弊故謂讀爾雅不熟也同上

金華戴元禮國初名醫嘗被召至南京見一醫家迎求溢戶酌應不閒元禮意必深于術者注目焉按方發劑皆無他異退而怪之曰往觀焉偶一人求藥者既去追而告之曰臨煎時下錫一塊麾去元禮始大異之念無以錫入煎劑法特叩之答曰是古方爾元禮求得其書乃錫字耳元禮急為正之嗚呼不辨錫

錫而醫者世胡可以弗謹哉金臺紀聞

毅叔遁去 啓東壓驚

宋宋道方字毅叔南京人以醫名天下不肯計請病者扶攜以就求脉政和中田登守郡母病危甚呼之不至登怒曰使吾母死亦以憂則遣人攜至庭下呵之云三日之內不痊則吾當誅汝以徇衆毅叔診之曰尚可活處以丹劑遂愈田喜甚云吾一時相辱然豈可不刷前耻乎用太守之車從妓樂酬以千緡俾群卒導引還其家旬日後田家病復作呼之則全家遁去田母遂殂蓋其疾先已在膏肓姑以良藥緩其

死爾

王明清餘話

明盛御醫啓東永樂中東宮妃張氏十月經不通衆醫以為胎而脹一日上謂曰東妃有病往視之東宮以上命醫也導之惟謹既診出復曰使上病狀早若何晚若何一如見妃聞之曰朝廷有此醫者不早令視我何也出而疏方皆破血之劑東宮視之大怒曰好御醫早晚當誕皇孫乃為此方何也遂不用數日病益急乃復診之曰再後三日臣不敢用藥矣仍疏前方乃鎖之禁中家人惶怖或曰死矣或曰將籍沒家矣既三日紅棍前呼賞賜盛甚蓋妃服藥下血數

斗疾遂平矣既而上亦賜之曰非謝醫乃壓驚也文王

格公  
筆記

華公脾腐 錢氏膽橫

有人病腹中半切痛十餘日中鬚眉墮落華佗曰是脾半腐可剗腹養治也使飲藥令卧破腹就視脾果半腐壞以刀斷之刮去惡肉以膏傅瘡飲之以藥百曰平復魏志註  
佗別傳

一乳婦因悸而病既愈目張不得瞑錢乙曰煮郁李酒飲之使醉即愈所以然者目系內連肝膽恐則氣結膽橫不下郁李能去結隨酒入膽結去膽下則目

能瞑矣宋史續醫說橫作衡

左慈補導 沉建服食

潁川郤儉能辟穀飼茯苓甘陵甘始名善行氣老有少容廬江左慈知補導之術並為軍吏初儉至之所伏苓價暴貴數倍議郎安平李章學其辟穀食伏苓飲寒水水寒中泄利殆至殞命後始來眾人無不鵠視狼顧呼吸吐納軍祭酒弘農董芬為之過差氣閉不通良久乃蘇左慈到又競受其補導之術至寺人嚴峻徃從問受奄豎真無事於斯術也人之逐聲乃至於是也典論

後漢沉建者丹陽人也父為長吏而建獨學好術不肯仕官學導引服食之術延年却老之法又能醫治病無輕重建治輒愈建斷穀不食輕舉飛行或去或來如此三百餘年乃絕跡不知所之神仙傳

李源天寶 從志陰德

李源字巨川金時名醫也名醫圖作李道源寶太師序流註指要後有云李君巨川以鍼法救疾除疾病於目前愈瘵疾於指下信所謂伏如橫弩應若發機萬舉萬全百發百中加以好生之念素無竊利之心嘗謂予曰天寶不付於非仁聖道須傳於賢者醫學源流

聶從志  
出千夷  
堅志陰  
德中

宋聶從志儀州華亭人良醫也邑丞妻李氏病垂死治之得生李氏美而淫慕聶之貌他日丞往旁郡李偽稱疾邀之伺其至語之曰我幾鬼路賴君復生顧世間物無足以報德願以此身供枕席之奉聶驚懼趨而出李復盛飾而迨夜出就之聶絕袖脫衣乃止亦未嘗與人言後一子登科其孫圖南紹興中為漢中雒縣丞夷堅志

謙甫衛生 明之辨惑

羅天益字謙甫真定人東垣弟子潛心苦學真積力久居東垣門下十餘年盡得其妙所著有衛生審鑿



二十四卷行世古今醫統

李果字明之真定人也世以貧雄鄉里果幼歲好醫藥時易人張元素以醫名燕趙間果捐千金從之學不數年盡傳其業家既富厚無事於技操有餘以自重人不敢以醫名之大夫士或病其資性高蹇少所降屈非危急之疾不敢謁也其學於傷寒癰疽眼目病為尤長元史東垣所著有醫學發明脾胃論內外傷辨惑論蘭室秘藏此事難知藥象論總若干卷而試效方其門人羅天益所輯者也魯齋許先生曰東垣之醫醫之王道也有志于學醫者必盡讀東垣之書

而後可以言醫醫史

進之醫壘 子陽壽域

元王好古字進之號海藏先生東垣弟子也著仲景詳辨活人節要歌括三備集醫壘元戎湯液本草癰瘕論光明論標本論小兒吊書雜著有傷寒辨惑論辨守真論十二經藥圖解仲景一集此事難知醫學源流漢王吉字子陽瑯琊臯虞人也少好學明經吉上疏云休則俛仰誦信以利形進退步趨以實下吸新吐故以練藏專意積精以適神於以養生豈不長哉大王誠留意如此時心有堯舜之志體有喬松之壽歐

世之民躋之仁壽之域

漢書

醫林蒙求卷中終

